



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Vita Reverendi Patris Vincentii Carafæ, Septimi Societatis
Jesu Generalis**

Bartoli, Daniello

Leodii, 1655

Cap. VI. Accurata ejus observatio votorum Religiosorum.

urn:nbn:de:hbz:466:1-42928

monia præconio non eget: ipsum ejus silentium magnifica vox est, & pulchritudo admirationis illicium.

C A P U T VI.

Accurata ejus observatio votorum Religiosorum.

Pauper-
tatis re-
ligiosæ
studiū
genera-
sium

PAUPERTAS religiosa, si ex animo colatur, non exilis animi virtus est. namque commodis sponte se fraudare, & contrà incommoda non leniter solùm, sed & jucundè hilaritérque suscipere ac perferre, id verò supra vulgus hominum est. Erit autem etiam supra fidem, si ex heroïco singularique Numinis amore asperneris quidquid Deus non est; indignum utique arbitratus, ut cum Deo summo bono vile nescio quod boni simulachrum in partem amoris tui à te vocetur, quasi si Deus toto dignus non esset. Hac excelsa mente prædictus Vincentius solebat dicere, si totum terrarum Orbem haberet in manibus, totum ipsi ad pedes casurum, hoc dumtaxat pronunciato, *Mi Deus.* ut indicaret ad Numinis

minis recordationem res omnes conditæ, ut prorsus despicabiles, imo loco, imò nullo apud se esse. Neque tantum alienissimus erat ab omni corporis commoditate: sed necessariis etiam destitutum, esse eoque redactum ex charitate Dei, quo mendicabula ex necessitate, unicè eum delectabat. Unde gratum identidem certamen existebat, hinc paupertatis Vincentii, illinc providæ charitatis Præsidum. Hi enim cognito, seu sanum seu ægrum plus aggredi ac sustinere, quam natutæ vires non incommodè ferre possent, pro munericis sui ratione, quæ usui essent, ipsi providere studabant: ille ex adverso delicias reputans, atque respuens, quidquid merissima necessitas non postulabat, quantis poterat precibus, collectisve undique argumētis, paupertatis suæ causam agebat. Quamquam autem ejus studii exempla non nisi in exiguis rebus suppetunt (quoniam majoribus semel penitus exuto non nisi leviora abdicanda restabant) tamen neque hæc prætermittenda duxi, sive quia licet in tenui est labor, at tenuis non gloria vel in hoc vincere scipsum, sive quia,

quia, quod necessitatis speciem habet,
grande semper appareret, ut & nobis
nosipſi.

Particu-
latim in
amicitu
ac men-
ſa

Imprimis huc quoque pertinet, quod
pro mundi contemptu de laceris ejus ve-
ſtibus dixi: pro quibus novas, licet è vili
materia, illi offerre, erat querere repul-
ſam. Sola obedientiæ ratio, ut tritas di-
mitteret, evincebat, latus alioqui, dum
longo uſu attrituque in laciniās decessiſ-
ſent: tumque veteres veteribus, at minus
laceris, magisque decentibus mutabat.
Inſtitere aliqui aliquando ut thoracem
ex vili ac paupertino panno indueret;
ſed quia novus, ideo ut pretiosior juſto
viſus illi, & illicò repudiatus eſt. Cūque
Pater Minister adigere illum vellet:
Succine, ait, me amas, ut in purgantes
pœnas præcipitem dare velis? Si mei te
miseret, cur non potius laboras, ut al-
terius vitæ flammis, quam buius frigori
ſubtrahas? Quando hyems ingruebat, et ſi
per ſe rigeret gelu, ut alias diximus, nihil
tamen algori arcendo petebat: non mo-
dò, quod tempeſtas frigida ſatis pro eo
loqui, ſed maximè quod ejusmodi peti-
tio videretur eſſe pauperis egeſtatem

non

non sponte, vel certè ægriùs quàm jucundiùs ferentis. Erant illius strophiola vetera, laceráque, & ipse met ea pauperum ritu lavabat. Denique amictu utebatur ejusmodi, ut Patres Oratorii Neapoli non raro illius mentionem domi cum insigni approbatione facerent: & si quis ex iis attributa sibi veste minus contentum se præberet, Præfectus rerum spiritualium sedando illius animo Carafæ exemplum proponens, identidem innueret non esse querulum illum Carafā præstabiliorē, qui tantus genere, doctrinâ, prudentiâ, virtute cùm sit, tamen mendiculi instar amictus incedat. Neque verò alio quàm mendicabuli sensu, dum stipem exspectat non ad suum sed ad largientis arbitrium, communi nostrorum mensæ accumbebat. Ut enim non queritur ille detenui stipe, ac mensâ (si fortè aliquâ excipitur) sed quidquid donatur, cum gratiarum actione accipit: ita Vincentius. Propterea etsi quādoque esculenta insulsa insipidáque ei apposita essent, ne nutu quidem significabat; imò nec micâ salis condiebat, partim quòd à patientia melius illi condimentum erat, partim quòd mendicum.

mendicum se meminerat; cui profecto alienæ mensæ assidenti non sit tanta præfidentia. Ita si fortè per ministrorum oblivionem illi non præberetur quod præbitum esset communiter omnibus, neminem monebat: usque adeo, ut etiam Generali solam frigidam gustare contigerit, per non vulgarem præfecti triclinio oblivionem vinum illi apponendi: ita credo, providente Deo, ut maiorem ejus sitim ac desiderium incommodorum, aptius aquâ expleret.

In su-
pelle-
atile.

Tota porrò cubiculi ejus supellex, lectus erat tam angustus, ut in eo se invertere sine lapsûs periculo vix posset. Scamnum item sine dorsi fulciméto: unica ac nuda imago papyracea, pauxillum librorum ex veterimis, ac maximè neglectis. Cùmque Tostati commentariis valdè egeret, numquam eos admittere sustinuit, utpote cariores, quàm se pauperem deceret. Imò ne sua quidem Philosophiæ ac Theologiæ scripta, sua propriè esse volebat, quæ ut aliis usui essent, nitido politóque charactere exarari curaverat. Tulerat aliquamdiu super pectora Christi pendentis è cruce sigillum, materia

materiâ juxta figurâque vile; sed secum reputans, sat pauperi fore, si in corde gestaret, & eo se spoliavit. Quotannis inter exercitia spiritualia sedulò excutiebat cubiculi res omnes: & si quam compireret non omnino sibi necessariam, ea se protinus abdicabat. Quamquam difficile erat ullam deprehendere; cùm ne amicorum quidem dona ex Indiis à se missa hærere in manibus, nedum in cubiculo sineret, de talibus dicere solitus, *ad nihilum valere ultra, nisi ut mittantur foras.* Cùm Rectorem tirocinii ageret, res etiam quibus carere non poterat, ne quid amoris proprii iis adhæresceret, cum aliis ejusdem generis mutabant. Quocirca quando de more Societatis, novitii reculas omnes suas (ut globulos, codicesque precatorios ac spirituales, imagines, cilicia, flagra) ad exundum illarum amorem in medio ponunt, sortitò recipiendas, suas ipse, quatenus licebat (cilicum enim illius ac flagrum tironum imbecillitati non congruebant) aliis immiscebatur. Neque vero supremæ in Societate dignitatis accessione, quidquam de studio illo paupertatis decessit:

verùm eò emicuit magis , quò plura
tantam celsitudinem ceteroqui decentia,
contemnere ac respuere potuit. Erant
in anteriori Generalis cubiculo nonnullæ
tabulæ pictæ pereleganter , solo ejus, qui
Mutio Vitellesco donaverat respectu
istic relictæ; Vincentius hoc respectu jam
liber , inde sublatas sacrario inferri vo-
luit. Abstulit etiam è suo conclavi de-
cessorum Generalium imagines , ne ad
ornatum potiùs, quàm ad religionem ibi
pendere viderentur. Quin & illinc effer-
ri jussit pictæ à S. Lucâ imaginis S. Mariæ
Majoris piissimum exemplar B. Borgiæ
curâ expressum, quo tum antecessores,
tum ipse ad pluteum precarium usus erat
ciendæ pietati. Unde minimè mirum
est ejusdem jussu coriaceas sellas indi-
dem asportatas: quamvis excipiendis de-
centiùs externis ad Generalem adeunti-
bus factæ & necessariæ videbantur: cen-
sebat enim non dedecere Præsidem Re-
ligiosum, atque adeo pauperem, sedibus
ligneis & inornatis pauperem in modum
adeuntes accipere. Nec enim decorum
cuique, quod magnificum: & nitida pau-
pertas statui consentanea per se ipsa
splendet:

splendet: apparatu extraneo obscuratur. Denique nullum vestigium opulentiae, imò nec ejus umbram admisit, qui & libros aliquot è Generalis bibliothecâ, quòd margine aurato essent, eliminandos curavit, permutans cum leviùs concinnatis; atramentoque induxit lineas aureas, breviario suo illitas: & extrema paupertatis religiosæ sectatus est in supellecstile necessaria, qui diurnale, licet veterimum, adeoque dissolutum; ut propter plurium annorum usum & attritum folia defluerent, cum novo mutari noluit, sed denuo ac simpliciter compingi: ita quidem ut ardenter amorem paupertatis tegeret velo commoditatis. Et verò virtuti commodum est, quidquid è genio illius est.

Neque in ceteris rebus mirius, quām <sup>In cœ-
teris</sup> in supellecstile amor ille constituit. Hymali tempestate ut oleo parceret, orationi ac speculationi vacabat in tenebris. Et quando memoriæ causâ aliquid annotandum erat, in epistolæ dorso aut papyri fragmento annotabat. Ad manus ante missam faciendam abluendas, non sapone, ut istic moris est, sed fæcibus

aquâ mixtis utebatur, saponem delicias,
& quidem nimis caras arbitratus. Num-
quam, et si aliis præfetus, passus est cel-
lam suam à quoquam alio verri , quod
censeret dedecere pauperem fratribus,
ut famulis uti ad privatam commodita-
tem, contrà quām nonnulli, quos etiam
extra præfecturam non necessitas, atque
imbecillitas , sed vana nescio quæ ambi-
tio authoritatis, non sine aliorum offen-
sione, ad id ministerii sibi procurandum
allicit. Et quoniam aliqui captata oppor-
tunitate ejus è domo egressūs , illius cu-
biculum ex religione clanculum verre-
bant, ipse re cognita ut ab eo officio eos
averteret, furtim pár pari reddebat. Imò
etiā ultro, neque provocatus ullo benefi-
cio officiōve, omnium servū se præstabat;
& cùm studiis operam daret , socrorum
lectos reconcinnabat, calceos purgabat,
& dum clam licebat, etiam vestes. Si
quis comite opus haberet ad egredien-
dum domo , quolibet tempore atque oc-
casione paratus aderat Vincentius, omni
eo, quod erat in manibus protinus abje-
cto. Quippe eò latus de more fidelium
Deo servorum quod non suus, sed com-
muniter

muniter omnium servus esset: usque
ad eo ut si fratum aliquis ei occurreret
lignis aliave re onustus, quantocius ei
levando manum offerret, partemque
oneris humeris suis imponeret. Si vero
precibus obtinere nequibat, ut iis vilissi-
mo quoque in munere famularetur, ut
in valetudinario aut culinâ, clanculum
illud expediebat. Summâ studebat vitam
vivere pauperis, quotidianâ stipe victum
comparantis, & hanc quidem omnium
usui devovere. ejusmodi autem vitam
faciebat tanti, ut admisso à se (dum Pro-
vincialis erat) primo ex omnibus, dome-
stico servo in Fratrem laicum, eo tan-
quam primogenito sancte gloriaretur.

Jam quod attinet ad castitatis, quod est Vincen-
alterum religiosi Instituti votum, rem tii casti-
monia
summatim complexus fuero, si dicam
Vincentium non minus virginem mor-
tuum esse, quam natum. Et haec una
eademque omnium, qui cum novere,
vox est, quam ratio vitae illius omnis
abundè confirmat. Illud enim singularis
ejus in Immaculatam MARIAM amor,
illud unica in rebus divinis voluptas, ar-
cta item ac perpetua cum Deo necessi-

X3 tudo,

tudo, terrenorum sensum hebetare potens, nec non solitudinis studium, & sedula sui custodia, juncta piæ in corpus sævitiae, denique angelica modestia, quæ tot in aliis desideria peperit; quæ nitoris animi, quæ vitæ religiosæ, locupletiùs omni testimonio comprobant. Ceterum numquam feminas adibat officii causâ, licet Principes ac consanguineas, easque sibi in plateis obviaturas, cujuscumque forent conditionis, declinabat: pestem ex earum vicinia metuere dixisse. Et licet ætate jam proiecta, adeo tamen demissis humi oculis ingrediebatur, ut frequenter à comite de salute honestis reddenda esset monendus. Adde illum, etiam foris, & in compitis cum ageret, ambularé tve, domi ac secum egisse, memorem Numinis ubique præsentis. Quam tuendæ castimoniæ rationem vehementer probabat. nam qui secum minimè habitet, facilè ad exteriora dispergi dissipari que: contrà autem menti bene occupatæ frustra proponi libidinis illicium. Et qui Dei conscientiam veneretur, modesteque innocentérque in oculis hominum se gerere. Porro ex illius

illius nitore ipso vultu emicante cùm alia varia, tum hæc nominatim manabant. Primum ciebat ille non mediocrem adversus Vincentium reverentiam. Siquidem ut benignissimè haberet peccata sua ritè confitentes, tamen qui se turpibus inquinaverant, ad eum exomologeseos ergò accedere verebantur, ne horum narratione alienissimum illius ab omni turpitudine animum affligerent. Alterum hoc utilius indidem existebat, ut qui importunius vehementiusque ad impuram libidinem sollicitabantur præsens in ejus aspectu remedium invenirent, vel etiam in recordatione.

Præterea res ipsæ, quæ illius contactu velut consecratæ fuerant, simul vim contraxerant genium impunitatis fugandi.

Adeo odor castimoniæ Vincentianæ, sty-
gio illi lenoni gravis est! Certè illius chirographum hanc virtutem certò pro-
didit. & fuere qui testarentur appositâ super corde voluptatis pruriru concitato
togæ Vincentii laciniâ, simul nefandos refedisse motus, simul fœdas imagines subitò discussas esse. Virgo verè religiosa, Virginis
atque adeo corpore pariter animoqué Reli-
purissima,

purissima, biduum integrum assiduâ vehementiâ libidinis titillatione percita, nec inducias noctu, nec quietem interdiu sentiebat ullam. Interea jejunio acri, frequentiâ flagellatione, aspero cilicio corpusculum afflictans, easque duas noctes in sellâ transigens, in suspiria lacrimasque effundebatur. Sed hæc omnia frustra. gliscebat quinimo malum, & hostis in horas fortior evadebat. Sed tamen præsto erat, at clandestinò, ut assolet, Virginum Sponsus, cuius demum instinctu recordata penes se habere Vincentii chirographum, continuò arripit, excitatâque in eum fiduciâ pectori apponit; Deum precatur ut Sancti Patris meritis sibi misellæ adsit tandem, & hoste devicto restituat pacem. neque mora est. vix finita prece, extinguitur illecebrosus ignis, evanescunt imagines turpes, quieti castissima virgo redditur, & ab ipsa grates assertori secundùm Deum Vincentio. Nec dispar fuit cuiusdam Sacerdotis curatio in simili morbo. vexabatur etiam hic, & gravius quidem quam illa, fortiusque intestinis naturæ rebellis præliis, continentes dies noctesque castimoniam

Sacer-
doti.

stimoniam infestantis, & nî Superi ad-
essent, propè ad gentis ad dditionem.
Quid consilii? veterem Vincentii ami-
ctum induit, simûlque natura Venereis
armis exuitur, oppugnare omnino cessat,
& ipse liber exultat. Admirabilior etiam, Juveni
efficaciorque fuit contactus epistolæ Vin- impu-
centii, cordi juvenis moribundi admotæ.
rissimæ
Jacebat ille lethali morbo correptus, non
corporis magis quam animæ. quippe in-
fano etiamtum mulierculæ amore irre-
titus, quicum haetenus impura consuetu-
do. Monitus de mortis periculo ac tem-
pore noxas confessione expiandi, aliud
non respondebat, quam velle se ami-
cam suam sibi in cubile deferri; hanç
esse corculum suum, ejus desiderium se
minimè ferre amplius posse. Neque ve-
ro vis morbi, aut orta hinc phrenesis,
aliave quam amoris insania verba hæc
exprimebat: ut appareret nihil homini
perditio pensi esse æternum perire, modò
quam deperibat, amplexari posset. Jám-
que de illius salute desperabant domesti-
ci, cùm venit in mentem opis unius è
Patribus nostris implorandæ. Venit ille
advocatus properè, sed & properè domū

redit, comperto non esse opis, aut artis
sux tam difficilem, animi pestem aman-
tis, curationem, potentiusque accersen-
dum sibi remedium. Ergo arrepta do-
mi epistolâ Vincentii, recurrit ad ægrum,
eāmque ejus pectori admovet. mirum
dictu! Subitò & inopinatò cœpit ille alia
omnia, quām haētenus fecerat, cogitare
ac loqui. Confessione flagitia eluit, quip-
pe tanto cum doloris sensu exposita, ut
in singultus ac lacrimas totus abiret; cen-
sueritque Pater moderandum illum (ne
fortè in diffidentiam descisceret) propo-
sita reo certissima Numinis promissione
omnibus ignoscendi, qui crimina ritè,
& cum pœnitudine agnoscerent. Qua-
propter illa Vincentii epistola fortuna-
tum à Deo nuncium salutis hujus per-
diti juvenis attulisse videri potest.

Eiusdē
obediē-
ta præ-
stantia,
primum
quod
Deum
in Præ-
sidibus
agnos-
ceret

Superest mihi de obedientia dicen-
dum, quam tanti faciebat Vincentius,
ut affirmaret legum Præsidumque Socie-
tatis observantiam & sanctitatem, diver-
sa quidem esse nomina, sed rem eamdem.
Propterea ut erat hujus perquām studio-
fus, ita numquam eum quisquam vidit
ab ipso Societatis ingressu, ad finem
usque

usque vitæ, id est, spatio quadraginta
quinque annorum, vitium ullum, etiam
leve contra obedientiam admittere.
Cujus tantæ virtutis triplex caput depre-
hendo. Primùm, Deum ipsum intuebatur
in Præsidibus. quocirca etiam postquam
primariis Societatis muneribus perfun-
ctus erat, etiam Provincialatu, et si Mo-
deratores suos ætate ceterisque condi-
tionibus præcelleret, cum singulari sub-
missione reverentiaque coram illis com-
parebat: non modò eos affabatur. Cùm
verò æris campani sonum aliquo vocan-
tis audiret, ex templo quasi Numinis au-
disset vocem in aëre formatam, abjectis
omnibus eò se conferebat, vel verbum
intersecans, si cum alio fabularetur: us-
que adeo ut tironum nemini, quantum-
vis parendi studioso, quidquam conce-
deret. Quo quidem tempore ad Deum
conversus, quasi præsentem sentiret,
Vado, Domine, inquietabat. Erat quondam
sub tonsoris manibus, quando campanæ
sonus tempus antemeridiani examinis in-
dicavit. Continuò, licet tum aliis Præ-
fectus ea se lege, ut & alium quemlibet,
id temporis rectè eximere posset, vetus
fratrem

fratrem in opere progredi, amisitque
in proximam cellam examen institu-
rum; ipse autem, ut erat linteo tonsorio
involutus, semirarus, sapone illitus in ge-
nua procubuit legi ut pareret. Cumque
peracto ritè examine rediret frater ille
tonsor, Vincentium inflamatâ facie
comperit, quasi è fornace proximè egre-
sum. Et sane sacer ille ardor è fornace
amoris haustus erat: credo, in merce-
de m'purpuramque promptæ obedientiæ.
Neque in legitimis dumtaxat Præsidibus
Deum spectavit Præsidem, sed in iis
etiam, qui vix umbram authoritatis in
ipsum erant sortiti. Inscripterat nomen
albo cuiusdam secreti cœtus (confrater-
nitatem vocant) super alia pietatis ope-
ra, insigni studio fructuque damnatos
ad mortem reos parantis. Rogatus, ut
stato die exhortationem ad Sodales ha-
berer, præ demissione animi indignum
se judicans qui homines tantæ virtutis
hortaretur à quibus ipse excitandus esset,
obtinere à se non potuit ut acquiesce-
ret. Ratus itaque eam provinciam man-
dandum alteri, indicta cœtui luce & ipse
adfuit. At Præfectus Sodalitio Vincentio
animad-

animadverso ex improviso innuit, cathedram ut ascendat, deque rebus divinis differat. Nec ipse cunctatus, e vestigio, licet nihil minus expectasset, nullo non modo alienæ voluntatis, sed nec admirationis indicio (quod sanè rarissimum est inopinatis hujusmodi casibus) ad Sodales dicit, quæ Deus suggerit, quasi pluribus ante diebus meditatus esset. Illustrius quoque est quod illi contigit cum gentili suo Tiberio Carafa, Principe Bissignæ & Scyllæ, viro non virtute minus, quam stirpe nobili, qui unus satis docuit, à non ignobilibus animis cum aulico vitæ genere conjungi posse religiosam pietatem. Hic Vincentii præceptionibus ad frequentem æternitatis meditationem, curamque excultus, atque adeo ad congruentem amplitudini suæ sanctimoniam, præceptorem suum majorem in modum amabat. Quondam Calabriæ Collegia pro munere Provincialis lustranti; nobilem virum misit, qui Scyllam nomine suo invitaret. Non potuit id officii tam amico Societatis ac sui Principi recusare. addidit tamen non amplius, quam vesperam unicum apud eum

eum morari sibi esse integrum. At Princeps hujusmodi illius instituti gnarus, longioris moræ facultatem aliunde sibi providerat: nempe à Mutio Vitellesco, per quem quamdiu & quomodo ipsi libèret, Vincentium apud se retinere mensaque accipere licebat. Cùm igitur hic primùm Scyllam appulsus esset, ei Princeps denuntiat authoritatem in illum suam: & ipse hác intellectâ, licet alioqui alienissimus ab omni specie honoris ac commodi, nihil detrectans, nihil conquerens, aut objiciens, totum se Principis voluntati permittit, ac tironis ritu in omnibus obtemperat. Erat hoc palatum in modum religiosæ familiæ ordinatum, statum meditationi divinorum tempus, exanimi item conscientiæ, silentio, quieti. Quin & dignis Principe oblectamentis, nimirum venatui ursorum, & marino piscatui: quæ etsi Vincentius abhorrebat, virtutis consuetudine in naturam versa, nullum tamen tædii molestiæ signum edidit: néve interea nihil ageret, Deum suum hac opportunitate venabatur, aut arcana ex rebus objectis documenta sibi comitibusque accommodata eruebat. Sic enim

viri

viri probi, etiam ludendo Deum lucrificiunt, noruntque è mundi cœno cœlestes gemmas colligere.

Alter fons excellentiæ ejusdem virtutis hic erat, quod se non sui juris, sed divini penitus esse agnosceret, idque non communibus dumtaxat nominibus creationis, fidei divinæ sibi inditæ, Redemptionis, & ejusmodi: sed proprio irrevocabilis donationis sui per votum obediendi. Ita fiebat, ut integrum sibi fasque esse non putaret unum potius quam aliud velle ac nolle: imò nec judicio in aliquid propendere: sed id tantummodo sibi jam esse reliquum ut à Numinis nutu ac voluntate totus penderet, ac regeretur. Propterea etiam posteaquam Magistri Novitorum, Rectoris, Præpositi Domûs Professæ, & Provincialis muneribus perfunctus erat, eorum imperio se totum & omnino subjecit, etiam in pœnis alioqui voluntariis, ad quas mira animi propensione ferebatur. Cùm igitur eos obnixè rogasset illorum facultatem; si negaretur, non aliud addebat, quam se non suum esse, sed Rectorum. Erat illius incredibile studium solitudinis.

Solitus

Solitus fuit dicere, silvam aliquam aut specum abditam cum libro panisque & aquae dernenso, quantum ad arcendam mortem sufficeret, sibi pro cœlo in terris fore. Tamen foras missus ad curandam animarum salutem, aut gubernaculis Societatis admotus, ne punctum quidem subducebat temporis illius, quod ad munus suum recte obeundum opus erat. Reliquum dabat orationi, ac negotioſo illi otio, quo se Deo arctius coniungebat. Quando faciebat iter, aut agebat cum hominibus, gerebat se, ut erat, virum publici juris, pari profecto alacritate, affiduitate, tranquillitate animi, ac si negotiorum amor ingenitus illi esset. Nimirum absoluta numeris omnibus virtus viris sanctis pro indeole est. Denique et si muniorum, quibus adhibitus est, dignitas prægravis illi esset, propter egregiam demissionem, tamen & humilitatem, & orationis studio, & ceteris virtutibus reginæ omnium obedientiæ ad majus earum decus, meritumque æternæ gloriæ morem gerentibus, totus ferebatur, quocumque illa urgebat: quasi virtutum omnium, non aliis, quam obedientiæ finis, non alia proclivitas foret. Ter-

Tertium caput ejusdem præstantiæ,
 quòd probè intelligeret non aliam esse
 certiorem viam rationémque Numinis
 gratiam demerendi, observatione legum
 religiosarum. Sive enim à Conditore
 Religionis, ejusque successoribus toti
 Reipublicæ religiosæ in commune latæ
 sint, sive privatim ab aliquo Præsidum
 ferantur, utrosque voluntatis divinæ in-
 terpretes esse, & eas pro illius placitis
 habendas. Quæ si quis accuratè exequa-
 tur, nihil ambigi posse, quin Numini sit
 acceptus. neque verò privatis oraculis
 tantum fidei adhibendum, quicquid
 præcipiant, quantum legibus religiosis.
 quoniam illa phantasiaz figmentis, dæ-
 monisque ludificationibus non difficile
 immisceri corrumpique possunt, à qua
 suspitione longissimè absunt leges reli-
 giosæ. Atque ut errori & ipsæ obnoxiaz
 sint, quatenus manant ab homine, tamen
 certissimum tutissimumque esse eas ob-
 servare, quòd observandas dixerit ille
 qui nec falli potest, nec fallere. Quibus
 adde propriis Societatis constitutionibus
 religiosæ perfectionis præceptiones o-
 mnes contineri: atque adeo dilucidam

Y Evange-

Et quod
obediē-
tiæ cer-
ta sit via
ad per-
fectio-
nem

Evangelii, consiliorumque Christi explanationem, nihil ut iis obtemperanti ad sanctimoniam deesse possit.

C A P U T VII.

Vincentii ardens studium salutis animarum.

Quid illud excitat? **V**ETUS & verum dictum est, Charitatem esse flammam. Atqui sine pabulo flamma non vivit. Nec igitur Vincentii charitas illo carere poterat. Suggerebat illud pia ejus commentatio scripta super his Augustini verbis, Christi nomine cuique propositis: *His solve quod mihi debes.* Itaque contemplabatur Vincentius optimum atque amabilissimum J E S U M. Conscenso Olivetico monte, priusquam in cœlum eveharet se, ostendere ipsi illinc omnia cruciatuum ac mortis suæ instrumenta, catenas, flagra, spinas, clavos, crucem, lanceam, simulque insinuare, nihil ex illis non ipsius gratiâ esse toleratum. Hinc verò objectis illius menti cunctis hominibus sibi coœvis amicè sic præcipere: *His redde*